

FESTIVAL DI COSTUME DI CARNAVAL A BIRA TOPPER DI CARNAVAL



ORANJESTAD(AAN): Diavierna y Diasabra a keda demostra cu Carnaval di Aruba a haya otro "topper"

pa su actividadnan mas sobresaliente, hunto cu e eleccionnan di Reina, Calypso y Roadmarch Contest, Tumba Contest y Lighting Parade, y esey ta "Costume Festival".

Den 3 aña cu a organiza e evento aki den Cas di Cultura indicacion ta cu lo no por

sigui den Cas di Cultura cu e actividad aki cu den futuro lo por bira un di e actividadnan di mas grandi di nos carnaval.

Ta manera MC Scorpio Garcia a menciona, "un anochi impresionante, yen di fantasía y glamor y dedicacion".

Locual e organizadornan lo mester haci ta pa mira unda den futuro por organiza e evento aki pa e bira un di e

magneventonan di carnaval manera e mester tabata pa hopi aña caba.

Por a ripara cu espacio den Cas di Cultura ta preta, y pa e espacio necesario, Entertainment Center tampoco lo ta adecuado y mayoria di e hotelnan riba nos isla tampoco ta brinda e espacio adecuado, si no bini cu transformacionnan special pa e evento aki cu ademas ta hopi costoso como Festival Internacional y cu lo mester cubri su gastonan.

DIARIO a conversa cu turistanan cu e anochi aki tabata den Cas di Cultura, y tur a keda impresiona pa e show.

Ningun a yega di celebra carnaval na Aruba y tur a indica cu nan lo bolbe Aruba sigurotro aña of den futuro cercano pa experiencia Carnaval di Aruba, no solamente e fin di siman di Carnaval pero pa por lo menos un siman, mirando e experiencia di e Show internacional di Costume y show di baile esplendido di Coco Rico Dancers, canto di Mighty Heads, Tatoo, Longroy y King Timo di St. Maarten.